

小史掌邦國之志奠繫世辨昭穆若有事則詔王之  
忌諱大祭祀讀禮灋史以書敘昭穆之俎簋大喪大  
賓客大會同大軍旅佐大史凡國事之用禮灋者掌  
其小事卿大夫之喪賜諡讀誄

大父謂之昭子謂之穆父子相代謂之世世之所出  
謂之繫奠繫世以知其本所出辨昭穆以知其世  
序鄭氏謂小史敘俎簋以大史與羣執事讀禮灋  
爲節卿大夫之喪卽大史所謂小喪鄭氏所謂讀  
誄亦以大史賜諡爲節事相成

馮相氏掌十有二歲十有二月十有二辰十日二十



有八星之位辨其敘事以會天位冬夏至日春秋至月以辨四時之序

敘事春作夏訛秋成冬易厥民析因夷隩之屬是也天位星鳥星火星昴星虛之屬是也馮相氏辨而會之羲和之事也而以中士爲之則世及于此略天道詳人事矣

保章氏掌天星以志星辰日月之變動以觀天下之遷辨其吉凶以星土辨九州之地所封封域皆有分星以觀妖祥以十有二歲之相觀天下之妖祥

掌天星者掌天與星也所謂日月之變動五雲之



物十有二風皆天也遷亦變動變動吉凶之所生  
然天不因人而成故仰以志星辰日月之變動俯  
以觀天下之遷辨其吉凶分星各有所主封域歲  
無常主異於分星故以其相觀天下之妖祥

以五雲之物辨吉凶水旱降豐荒之禮象以十有二  
風察天地之和命乖別之妖祥凡此五物者以詔救  
政訪序事

五雲之物或兆吉凶或兆水旱兆水旱故以其物  
降豐荒之禮象使人知而爲備氣祥謂之禮形本  
謂之象以風察天地之和和則無事矣不和也則



命乖別之妖祥焉乖別在人而妖祥先見於風則亦人與天地同流通萬物一氣故也豐荒之禮象言降乖別之妖祥言命皆命而降之也命謂名言之救政救凶荒乖別之政序事救政之事所當先後緩急詔以詔上訪以訪下

內史掌王之八枋之灋以詔王治一曰爵二曰祿三曰廢四曰置五曰殺六曰生七曰予八曰奪謂之八枋之灋則其所掌者灋而已

執國灋及國令之貳以攷政事以逆會計掌敘事之灋受納訪以詔王聽治



周官新詁  
上以道制之下守以爲灋上以命使之下稟以爲  
令敘事事治先後也納納言于上訪訪事于下受  
納則受其所納之言受訪則受其所訪之對掌敘  
事之灋所以詔聽其事受納訪所以詔聽其情

凡命諸侯及孤卿大夫則策命之凡四方之事書內  
史讀之王制祿則贊爲之以方出之賞賜亦如之內  
史掌書王命遂貳之

策竹爲之方木爲之命以爲之節故以策命之祿  
及賞賜則以仁之故以方出之名之曰方則有義  
存焉讀四方之事書次于策命之之後則事非命



不立故也言書王命次于方出之之後則以命非  
祿及賞賜不行故也內史所掌始於八枋之灋蓋  
爵祿廢置生殺予奪無道揆無灋守而枋移于小  
人則何灋之能立何令之能行何治之能聽雖有  
爵祿賞賜適足誘天下而爲邪讀四方之事書則  
以納罔欺而已書王命而藏之則以記過惡而已  
外史掌書外令掌四方之志掌三皇五帝之書掌達  
書名于四方若以書使于四方則書其令

命後世所謂制也故內史書之令後世所謂詔也  
故外史書之外令國令也外史掌書之而內史執



其貳謂之外令以別於女史之內令書名者字也

字所以正名百物故謂之名

此注據訂義增

御史掌邦國都鄙及萬民之治令以贊冢宰凡治者受灋令焉掌贊書凡數從政者

凡數從政者若今御史掌班簿

此注據刪翼增

巾車掌公車之政令辨其用與其旗物而等敘之以治其出入

掌公車之政令者自庶人乘役車以上皆非私車也辨其用與其旗物而等敘之以治其出入者等等其上下敘敘其先後則以治其出入是故有先



路綴路次路之名焉

王之五路一曰玉路錫樊纓十有再就建大常十有二旂以祀金路鈎樊纓九就建大旂以賓同姓以封象路朱樊纓七就建大赤以朝異姓以封革路龍勒條纓五就建大白以卽戎以封四衛木路前樊鵠纓建大麾以田以封蕃國

玉德之美故以祀金義之和故以賓同姓以封象義之辨故以朝異姓以封革義之制故以卽戎以封四衛蓋革而制之以扞外蔽內是乃所謂義之制也且戎路不革無以待敵謂之四衛故欲其扞



外蔽內也木仁之質也故以田以封蕃國觀騶虞  
之詩則田事貴仁可知也蕃國不及以政則亦仁  
之而已且田路不革無所戒故也大常象天有日  
月焉大旂象春有交龍焉大赤象夏正南方之物  
也大白象秋正西方之物也大麾象冬正北方之  
物也玉路德之美也大常則以道格之金路義之  
和也大旂則以仁接之象路義之辨也大赤則以  
禮示之革路義之制也大白則以義受之木路仁  
之施也大麾則以知服之自大旂以下其以封也  
爲賜而已非諸侯所建諸侯所建則皆旂而已亦



非所謂大旂也故此諸旗義主於王而皆不以象  
諸侯之德言同姓以封而不言以封同姓言異姓  
以封而不言以封異姓則嫌以賓獨賓同姓以朝  
獨朝異姓故也建大麾以田而司馬辨旗物之用  
不言者司馬所辨教治兵而已既教治兵遂以獮  
田於是建大麾焉

王后之五路重翟錫面朱總厭翟勒面績總安車彫  
面鷺總皆有容蓋翟車貝面組總有握輦車組輓有  
翟羽蓋

后五路其制皆不可考然言翟則必以翟飾言輦



則必以人輓自翟車以下皆有容蓋自翟車以上則皆有握自輦車以上則皆有嬰羽蓋服物上得兼下下不得兼上故也

王之喪車五乘木車蒲蔽犬禭尾囊疏飾小服皆疏素車芴蔽犬禭素飾小服皆素藻車藻蔽鹿淺禭革飾駮車翟蔽然禭髮飾漆車藩蔽豸禭雀飾

喪車之制皆不可考然木車蔽禭囊服皆疏則必始喪所乘素車蔽禭服皆素則少變而飾以素不皆疏矣蓋後車變而彌吉以至于喪除焉犬禭則以犬皮爲車幣尾囊則以犬尾爲兵囊疏飾則用



素而疏素飾則變疏而素小服則矢服之小者鹿  
淺禛則以鹿之淺毛爲禛革飾則又以其革飾焉  
然禛則以然皮爲禛髹飾則飾以髹色豨禛則以  
豨皮爲禛雀飾則飾以雀色革不言色蓋如素車  
用素髹與雀不言物蓋如藻車用革木車尾囊鄭  
氏以爲始喪君道尙微與書以虎賁百人逆子釗  
同意蓋素車去囊藻車去服則宅宗久位定矣浸  
可以不戒也犬禛則始宅宗之時先王之政不可  
變先王之器不可失當守而已故禛用犬尾囊則  
明其爲御之末小服則明其爲戒之小鹿淺禛則



鹿之爲物知接其類始喪則與人辨稍吉則與人接其接之淺矣故禭用鹿淺然禭則然之爲物行有先後食有長幼喪事變而彌吉則將用禮焉故禭用然豻禭則豻夷犬也其守在夷方喪之時宅宗而已將卽吉則王政施焉將在四夷故禭用豻禭用豻則異于犬禭尾橐遠矣

服車五乘孤乘夏篆卿乘夏纁大夫乘墨車士乘棧車庶人乘役車凡良車散車不在等者其用無常凡車之出入歲終則會之凡賜闕之毀折入齋于職幣夏篆以采篆飾車也夏纁則采而不篆墨車則墨



而不采棧車則無飾矣考工記曰棧車欲弇飾車  
欲侈墨車以上皆飾車也役車鄭氏謂可載任器  
以其役然謂之乘則非特以載任器矣自役車以  
上皆有等者其用固有常餘或良或散唯所用而  
已

自役車以下  
據訂義增

大喪飾遣車遂廡之行之及葬執蓋從車持旌及墓  
嘑啟關陳車小喪共匱路與其飾

廡之於宮行之以適墓

歲時更續共其弊車大祭祀鳴鈴以應籬人

弊則更之闕則續之有須弊車爲用則共之



典路掌王及后之五路辨其名物與其用說若有大  
祭祀則出路贊駕說大喪大賓客亦如之凡會同軍  
旅弔于四方以路從

出路者或乘之或陳之

車僕掌戎路之萃廣車之萃闕車之萃萃車之萃輕  
車之萃凡師共革車各以其萃會同亦如之大喪廡  
革車大射共三乏

此五車者皆戎車故各有萃萃隊也戎路所謂革  
路廣車則左氏傳所謂乘廣闕車則左氏傳所謂  
游闕輕車則孫武所謂馳車萃車蓋輜車有屏蔽



者也各以其萃則其車之萃伍習睦焉

訂義引作各以其萃

以其車之萃伍睦焉言革車則五戎備廩焉

司常掌九旗之物名各有屬以待國事日月為常交

龍為旂通帛為旛雜帛為物熊虎為旗鳥隼為旟龜

蛇為旐全羽為旞析羽為旖

白常以下凡九物而旗居其一謂之九旗則猶公

侯伯子男謂之諸侯旗之名則旂常旛物之屬旗

之物則通帛雜帛之屬各有屬以待國事則自王

以下各有屬建旗則使其屬視而從焉則凡以待

國事謂國有祭祀師田賓客之事

十一字據義疏增

日月



爲常天道之運也交龍爲旂君德之用也能升能  
降乃不能亢故爲交龍焉通帛爲旌純赤而已赤  
之爲色宣布著見於文從直義可知矣雜帛爲物  
則兼赤白焉陰陽之義也熊虎爲旗義之屬也尙  
殺以猛鳥隼爲旟禮之屬也貴摯以速龜蛇爲旐  
和之屬也取完以果夫介其所以完也夫螯其所  
以果也全羽爲旞以全而遂之爲義析羽爲旛以  
析而旌之爲義

及國之大閱贊司馬頒旗物王建大常諸侯建旂孤  
卿建旛大夫士建物師都建旗州里建旟縣鄙建旐



道車載旛旂車載旌

王建大常則志天道也諸侯建旂則志君德也孤  
卿建旛則宜以事上也士建物則士雖賤亦物其  
所屬焉物其所屬則一陰一陽曷可少哉然物莫  
不貴陽而賤陰則帛之襍不如通之貴矣師都建  
旗則以毅猛致其義州里建旛則以摯速致其禮  
縣鄙建旂則以完果致其智以完果致其智則所  
以戡其敵以摯速致其禮則所以衛其上以毅猛  
致其義則所以用其眾卑而遠者能戡其敵貴而  
近者能衛其上爲之將者能用其眾軍旅之事如



斯而已所謂師都則孤卿也三孤一位而有師保  
傅之名大舉師則保傅從之矣此孤所以謂之師  
卿采邑爲都詩所謂都人則卿之有都者也此卿  
所以謂之都於其事上則謂之孤卿於其蒞衆則  
謂之師都於其蒞軍則又謂之軍吏大司馬所謂  
軍吏載旗是也師都建旗及教治兵則載旛焉以  
軍吏載旗故也州里州所里也五黨爲州州所建  
旛則建於州長之所里故曰州里建旛州言里縣  
鄙亦各建於其里可知也縣縣正鄙鄙師縣鄙建  
旛則遂官降卿一等故也言州建旛而不言鄉所



建則鄉大夫卿所謂師都是也言縣建旒而不言  
遂所建則遂大夫與州長皆中大夫且縣建旒則  
遂建旒可知也言州建旒而不言黨所建則黨正  
與縣正皆下大夫且州建旒則黨建旒亦可知也  
蓋軍自旅以上乃有旗故鄉遂所建自鄙以上而  
已道車載旒則乘以朝焉以底天下之道全而遂  
之旒車載旌則乘以游焉以閱天下之故析而旌  
之蓋王者朝無非道也游無非事也旌旒言載在  
車故也自旒以上言建則凡祭祀會同賓客建焉  
不必在車覲禮所謂上介皆奉其君之旂置于宮



皆就其旂而立是也

皆畫其象焉官府各象其事州里各象其名家各象其號凡祭祀各建其旗會同賓客亦如之置旌門

官府事異所畫象其事則足以相別州里及家別

無異事故所畫象其名號以別之

元作亦如之師從訂義正

都州里縣鄙類也而州里居中焉言州里則師都縣鄙亦象其名從可知矣祭祀會問賓客各建其旗者眾之所會使各視旗而知所從焉置旌門則置之而已於是掌舍受而設焉

大喪其銘旌建廬車之旌及葬亦如之凡軍事建旌



旗及致民置旗弊之旬亦如之凡射其獲旌歲時其更旌

軍事則以旌旗作其眾且有進退故建之及致民則置之而已無所事建置者植之弊者仆之歲時其更旌者弊則更之

都宗人掌都祭祀之禮凡都祭祀致福於國正都禮與其服若有寇戎之事則保羣神之壇國有大故則令禱祠既祭反命于國

家宗人掌家祭祀之禮凡祭祀致福國有大故則令禱祠反命祭亦如之掌家禮與其衣服宮室車旗之



禁令

都宗人若有寇戎之事則保羣神之壝者以其掌  
都祭祀之禮故使與小祝保神壝之在外者焉小  
祝言保郊此言保羣神之壝相備也都宗人正都  
禮與其服則家如之矣家宗人掌家禮與其衣服  
宮室車旗之禁令則都如之矣都宗人國有大故  
則令禱祠既祭反命于國則家亦如之矣家宗人  
國有大故則令禱祠反命祭亦如之則都亦如之  
矣既祭反命于國則雖非國故禱祠亦必命之祭  
然後祭



凡以神仕者掌三辰之灋以猶鬼神元之居辨其名  
物以冬日至致天神人鬼以夏日至致地元物魁以  
禴國之凶荒民之札喪

日月星謂之三辰其氣物時數升降出入往來鬼  
神元各以象類從焉故三辰之灋可以猶鬼神元  
之居辨其民物

周官新義卷十一

後學 王簡 校訂



卷之八

三



周官新義卷十二

宋 王安石 謨

夏官一

惟王建國辨方正位體國經野設官分職以爲民極  
乃立夏官司馬使帥其屬而掌邦政以佐王平邦國  
政官之屬大司馬卿一人小司馬中大夫二人軍司  
馬下大夫四人輿司馬上士八人行司馬中士十有  
六人旅下士卅有二人府六人史十有六人胥卅有  
二人徒三百有廿人凡制軍萬有二千五百人爲軍  
王六軍大國三軍次國二軍小國一軍軍將皆命卿



二千有五百人爲師師帥皆中大夫五百人爲旅旅帥皆下大夫百人爲卒卒長皆上士廿有五人爲兩兩司馬皆中士五人爲伍伍皆有長一軍則二府六史胥十人徒百人司勳上士二人下士四人府二人史四人胥二人徒廿人

馬質中士二人府一人史二人賈四人徒八人

量人下士二人府一人史四人徒八人

小子下士二人史一人徒八人

羊人下士二人史一人賈二人徒八人

司權下士二人徒六人



掌固上士二人下士八人府二人史四人胥四人徒  
四十人

司險中士二人下士四人史二人徒四十人

掌疆中士八人史四人胥十有六人徒百有六十八人  
候人上士六人下士十有二人史六人徒百有廿八  
環人下士六人史二人徒十有二人

挈壺氏下士六人史二人徒十有二人

射人下大夫二人上士四人下士八人府二人史四  
人胥二人徒廿八人

服不氏下士一人徒四人



射鳥氏下士一人徒四人

羅氏下士一人徒八人

掌畜下士二人史二人胥二人徒廿人

司士下大夫二人中士六人下士十有二人府二人

史四人胥四人徒四十人

諸子下大夫二人中士四人府二人史二人胥二人

徒廿人

司右上士二人下士四人府四人史四人胥八人徒  
八十八人

人之左手不如右強故車置勇力之士謂之右注此



據訂  
義增

虎賁氏下大夫二人中士十有二人府二人史八人  
胥八十人虎士八百人

旅賁氏中士二人下士十有六人史二人徒八人  
節服氏下士八人徒四人

方相氏狂夫四人

大僕下大夫二人小臣上士四人祭僕中士六人御  
僕下士十有二人府二人史四人胥二人徒廿人  
隸僕下士二人府一人史二人胥四人徒四十人  
弁師下士二人工四人史二人徒四人



司甲下大夫二人中士八人府四人史八人胥八人  
徒八十人

司兵中士四人府二人史四人胥二人徒廿八人

司戈盾下士二人府一人史二人徒四人

司弓矢下大夫二人中士八人府四人史八人胥八  
人徒八十八人

繕人上士二人下士四人府一人史二人胥二人徒  
廿八人

橐人中士四人府二人史四人胥二人徒廿八人  
戎右中大夫二人上士二人



齊右下大夫二人

道右上士二人

大馭中大夫二人

戎僕中大夫二人

齊僕下大夫二人

道僕上士十有二人

田僕上士十有二人

馭夫中士廿人下士四十人

校人中大夫二人上士四人下士十有六人府四人

史八人胥八人徒八十八人



趣馬下士阜一人徒四人

巫馬下士二人醫四人府一人史二人賈二人徒廿人

牧師下士四人胥四人徒四十人

廋人下士閑二人史二人徒廿人

木高則氣澤不至而橐弓矢之材以木之橐者爲

之

鄭氏語引  
王氏語

圉師乘一人徒二人圉人良馬匹一人駑馬麗一人  
職方氏中大夫四人下大夫八人中士十有六人府  
四人史十有六人胥十有六人徒百有六十八



土方氏上士五人下士十人府二人史五人胥五人  
徒五十八人

懷方氏中士八人府四人史四人胥四人徒四十八  
合方氏中士八人府四人史四人胥四人徒四十八  
訓方氏中士四人府四人史四人胥四人徒四十八  
形方氏中士四人府四人史四人胥四人徒四十八  
山師中士二人下士四人府二人史四人胥四人徒  
四十八人  
川師中士二人下士四人府二人史四人胥四人徒  
四十八人



邊師中士四人下士八人府四人史八人胥八人徒  
八十八人

匡人中士四人史四人徒八人

揮人中士四人史四人徒八人

都司馬每都上士二人中士四人下士八人府二人  
史八人胥八人徒八十八人

家司馬各使其臣以正于公司馬

大司馬之職掌建邦國之九灋以佐王平邦國制畿  
封國以正邦國設儀辨位以等邦國進賢興功以作  
邦國建牧立監以維邦國制軍詰禁以糾邦國施貢



分職以任邦國簡稽鄉民以用邦國均守平則以安邦國比小事大以和邦國

以九伐之灋正邦國焉弱犯寡則眚之賊賢害民則伐之暴內陵外則壇之野荒民散則削之負固不服則侵之賊殺其親則正之放弑其君則殘之犯令陵政則杜之外內亂鳥獸行則滅之

眚若人之瘦眚使其彊更弱其眾更寡所以正其馮弱犯寡之罪也賊殺其親則正之者正以服屬

之灋

此注據刪翼增

正月之吉始和布政于邦國都鄙乃縣政象之灋于



象魏使萬民觀政象挾日而斂之乃以九畿之籍施  
邦國之政職方千里曰國畿其外方五百里曰侯畿  
又其外方五百里曰甸畿又其外方五百里曰男畿  
又其外方五百里曰采畿又其外方五百里曰衛畿  
又其外方五百里曰蠻畿又其外方五百里曰夷畿  
又其外方五百里曰鎮畿又其外方五百里曰蕃畿  
方千里曰畿則禹貢所謂甸服也甸服面五百里  
則爲方千里矣其外侯畿甸畿禹貢所謂侯服也  
又其外男畿采畿禹貢所謂綏服也又其外衛畿  
蠻畿禹貢所謂要服也又其外夷畿鎮畿禹貢所



謂荒服也又其外蕃畿在禹貢五服之外

凡令賦以地與民制之上地食者參之二其民可用者家三人中地食者半其民可用者二家五人下地食者參之一其民可用者家二人

中春教振旅司馬以旗致民平列陳如戰之陳辨鼓鐸鐳鐳之用王執路鼓諸侯執賁鼓軍將執晉鼓帥帥執提旅帥執鼙卒長執鐳兩司馬執鐸公司馬執鐳

中春教振旅者春陽用事非兵之時雖如戰之陳

而平列陳則無事於戰矣

春陽以下據訂義增

鼓陽也尊者



執之金陰也卑者執之饒以止鼓與陽更用事焉  
故卒長執之通鼓節鼓佐陽而已故兩司馬公司  
馬執之謂之公以別於私亦稱司馬所謂家司馬  
是也

以教坐作進退疾徐疏數之節遂以蒐田有司表貉  
誓民鼓遂圍禁火弊獻禽以祭社

社者土元也

據訂  
義增

中夏教芟舍如振旅之陳羣吏謨車徒讀書契辨號  
名之用帥以門名縣鄙各以其名家以號名鄉以州  
名野以邑名百官各象其事以辨軍之夜事其他皆



如振旅遂以苗田如蒐之灋車弊獻禽以享禱

中秋教治兵如振旅之陳辨旗物之用王載大常諸  
侯載旗軍吏載旗師都載旛鄉遂載物郊野載旒百  
官載旗各書其事與其號焉其他皆如振旅遂以獮  
田如蒐之灋羅弊致禽以祀祊

中冬教大閱前期羣吏戒眾庶修戰灋虞人萊所田  
之野爲表百步則一爲三表又五十步爲一表田之  
日司馬建旗于後表之中羣吏以旗物鼓鐸錫鐃各  
帥其民而致質明弊旗誅後至者乃陳車徒如戰之  
陳皆坐羣吏聽誓于陳前斬牲以左右徇陳日不用



命者斬之中軍以鼙令鼓鼓人皆三鼓司馬振鐸羣  
吏作旗車徒皆作鼓行鳴鐃車徒皆行及表乃止三  
鼓攙鐸羣吏弊旗車徒皆坐又三鼓振鐸作旗車徒  
皆作鼓進鳴鐃車驟徒趨及表乃止坐作如初乃鼓  
車馳徒走及表乃止鼓戒三闕車三發徒三刺乃鼓  
退鳴鐃且卻及表乃止坐作如初遂以狩田以旌爲  
左右和之門羣吏各帥其車徒以敘和出左右陳車  
徒有司平之旗居卒間以分地前後有屯百步有司  
巡其前後險野人爲主易野車爲主旣陳乃設驅逆  
之車有司表貉于陳前中軍以鼙令鼓鼓人皆三鼓



羣司馬振鐸車徒皆作遂鼓行徒銜枚而進大獸公  
之小禽私之獲者取左耳及所弊鼓皆駮車徒皆譟  
徒乃弊致禽饁獸于郊入獻禽以享烝

羣吏以鼓鐸旗物各帥其民而致則皆致之大司

馬焉師欲聽於一也

羣吏以下  
據刪翼增

使民以其死刑誅

不如是之嚴則民弗爲使矣然前期戒衆庶而後  
至可誅旣陳而誓然後不用命者可斬四時皆教  
而後田田習用衆焉言教而後可用也

四時以下  
據刪翼增

及師大合軍以行禁令以救無辜伐有罪若大師則  
掌其戒令涖大卜帥執事涖釁主及軍器及致建大



常比軍眾誅後至者及戰巡陳眠事而賞罰若師有功則左執律右秉鉞以先愷樂獻于社若師不功則厭而奉主車

鄉師致民以司徒之大旗則司馬致民宜以王之

大常矣凡此皆示其致民之命有所受之也

以上據訂

義以先愷樂獻於社怒釋而為愷故也

據刪翼增

王弔勞士庶子則相大役與慮事屬其植受其要以待攷而賞誅大會同則帥士庶子而掌其政令若大射則合諸侯之六耦大祭祀饗食羞牲魚授其祭大喪平士大夫喪祭奉詔馬牲



大司馬於大役與慮事欲知其故之可否屬其植  
欲知其人之多寡受其要欲知其功之等差事成  
而考之以行誅賞此注據訂義增  
小司馬之職掌凡小祭祀會同饗射師田喪紀掌其  
事如大司馬之灋

軍司馬闕

輿司馬闕

行司馬闕

司勳掌六鄉賞地之灋以等其功王功曰勳國功曰  
功民功曰庸事功曰勞治功曰力戰功曰多凡有功



者銘書于王之太常祭於太烝司勳詔之太功司勳  
藏其貳掌賞地之政令凡賞無常輕重眡功凡頒賞  
地參之一食惟加田無國正

王有天下諸侯則有一國召南言國君積行累功  
又曰羔羊鵲巢之功致左傳云諸侯言時計功則

功以國功爲主也

王有以下  
據刪翼增

太烝冬之太享當是

時百物皆報焉祭有功宜矣事勞若一時有劇易  
戰多若一敵有堅脆若此屬不可爲常故輕重眡

功

事勞以下  
據訂義增

馬質掌質馬馬量三物一曰戎馬二曰田馬三曰駑



馬皆有物賈綱惡馬凡受馬于有司者書其齒毛與其賈馬死則旬之內更旬之外入馬耳以其物更其外否馬及行則以任齊其行若有馬訟則聽之禁原蠶者

每馬各以三物量之以知其所宜

以上據刪翼增綱謂以

縻索維之所以制其奔踈也

量人掌建國之灋以分國爲九州營國城郭營后宮量市朝道巷門渠造都邑亦如之營軍之壘舍量其市朝州涂軍社之所里邦國之地與天下之涂數皆書而藏之凡祭祀饗賓制其從獻脯燔之數量掌喪



祭奠饗之俎實凡宰祭與鬱人受罍歷而皆飲之

受罍歷而皆飲之受罍傳之他器而皆飲之也鬱

人於祭祀達其氣臭以始之量人於祭祀制其量

數以成之

刪翼引此始之下有曰交神以德二者者也成之下有曰事神以禮者也

本末相成皆所以致福而達氣臭以始之者主王

制量數以成之者主宰故鬱人大祭祀與量人受

舉罍之卒爵而飲之量人宰制則與鬱人受罍歷

而皆飲之皆飲所以致福者盡矣

小子掌祭祀羞羊肆羊殺肉豆而掌珥于社稷祈于

五祀凡沈辜侯禳飾其牲釁邦器及軍器凡師田斬



牲以左右徇陳祭祀贊羞受徹焉

羊人掌羊牲凡祭祀飾羔祭祀割羊牲登其首凡祈  
珥其其羊牲賓客其其灋羊凡沈辜侯禳釁積其其  
羊牲若牧人無牲則受布于司馬使其賈買牲而其  
之

飾羔若禮所謂飾羔鴈者以績也灋羊謂牢禮之  
灋所用也

司燿掌行火之政令四時變國火以救時疾季春出  
火民咸從之季秋內火民亦如之時則施火令凡祭  
祀則祭燿凡國失火野焚萊則有刑罰焉



舉火曰燿祭祀用燿故祭焉

掌固掌修城郭溝池樹渠之固頒其土庶子及其眾庶之守設其飾器分其財用均其稍食任其萬民用其材器凡守者受灋焉以通守政有移甲與其役財用唯是得通與國有司帥之以贊其不足者晝三巡之夜亦如之夜三鑿以號戒

古者有城守則樹焉國語所謂城守之木是也有溝涂則樹焉司險所謂設國之五溝五涂而樹之以爲阻固是也司險樹之掌固修之

古者以下士據訂義增

者公卿大夫之適而已命者也庶子者國子之倅



而未命者也眾庶則其地之人民遞守者也夫士庶子所使帥眾庶而頒其守則遠近均焉勞逸更焉公卿大夫涖職於內而子弟守固於外休戚一體之道也

公卿以下二十二字據義疏增分其財用以給守事均

其稍食以養守者

若造都邑則治其固與其守灋凡國都之竟有溝樹之固郊亦如之民皆有職焉若有山川則因之

司險掌九州之圖以周知其山林川澤之阻而達其道路設國之五溝五涂而樹之林以爲阻固皆有守禁而達其道路國有故則藩塞阻路而止行者以其



屬守之唯  
有節者達之

掌疆

關

侯人各掌其方之道治與其禁令以設侯人若有方治則帥而致于朝及歸送之于竟

方各設其人以侯有方治者致之送之

環人掌致師察軍慝環四方之故巡邦國搏謀賊訟敵國揚軍旅降圍邑

搏謀賊以下皆環人巡邦國之事

挈壺氏掌挈壺以令軍井挈轡以令舍挈畜以令糧凡軍事縣壺以序聚櫜凡喪縣壺以代哭者皆以水



火守之分以日夜及冬則以火爨鼎水而沸之而沃之

射人掌國之三公孤卿大夫之位三公北面孤東面卿大夫西面其摯三公執璧孤執皮帛卿執羔大夫鴈諸侯在朝則皆北面詔相其灋

三公執璧則以有君之體而不致其用也

若有國事則掌其戒令詔相其事掌其治達

射之爲道利以直達有括則不至治達如之故掌治達者在射人也

以射灋治射儀王以六耦射三侯三獲三容樂以騶



虞九節五正諸侯以四耦射二侯二獲二容樂以貍  
首七節三正孤卿大夫以三耦射一侯一獲一容樂  
以采蘋五節二正士以三耦射豻侯一獲一容樂以  
采蘩五節二正若王大射則以貍步張三侯王射則  
令去侯立于後以矢行告卒令取矢祭侯則爲位與  
大史數射中佐司馬治射正

侯而祭之則神無不在而君子無所不用其至

祭祀則贊射牲相孤卿大夫之灋儀會同朝覲作大  
夫介凡有爵者大師令有爵者乘王之倅車有大賓  
客則作卿大夫從戒大史及大夫介大喪與僕人遷



尸作卿大夫掌事比其廬不敬者苛罰之

服不氏掌養猛獸而教擾之凡祭祀共猛獸賓客之事則抗皮射則贊張侯以旌居乏而待獲

抗皮贊張侯待獲皆服不服之意故服不氏掌之射鳥氏掌射鳥祭祀以弓矢毆鳥鳶凡賓客會同軍旅亦如之射則取矢矢在侯高則以并夾取之

先王置官大抵兼職射鳥氏雖無所兼其所射以共賓客膳獻亦足以償祿矣使毆鳥鳶以并夾取矢雖若不急然上下無乏事則以事爲之制故也羅氏掌羅鳥鳥蜡則作羅襦中春羅春鳥獻鳩以養



國老行羽物

掌畜掌養鳥而阜蕃教擾之祭祀共卵鳥歲時貢鳥物共膳羞之鳥

共卵及鳥物與獸同義翠腎羽翮之屬是也

司士掌羣臣之版以治其政令歲登下其損益之數辨其年歲與其貴賤周知邦國都家縣鄙之數卿大夫士庶子之數以詔王治以德詔爵以功詔祿以能詔事以久奠食唯賜無常

賜出於王之恩恩有厚薄賜有多寡又何常之有且賜而有常則辟無以作福矣



正朝儀之位辨其貴賤之等王南鄉三公北面東上  
孤東面北上卿大夫西面北上王族故士虎士在路  
門之右南面東上大僕大右大僕從者在路門之左  
南面西上

所謂治朝也若朝士之位與此不同者彼外朝之

灋聽獄弊訟詢眾庶之朝也

所謂以下鄉明以聽

天下者王也故南鄉面王而答之者公也故北面  
孤佑王者也故東面卿大夫佐王者也故西面王  
族故士虎士大僕大右大僕從者則從王者也故  
南面順王所向焉三公東上則北面以東爲右故



也自孤以下皆以近尊爲上公以下皆言面王獨  
言嚮不斥其體尊故也

司士擯孤卿特揖大夫以其等旅揖士旁三揖王還  
揖門左揖門右大僕前王入內朝皆退

掌國中之士治凡其戒令掌擯士者膳其摯凡祭祀  
掌士之戒令詔相其灋事及賜爵呼昭穆而進之帥  
其屬而割牲羞俎豆凡會同作士從賓客亦如之作  
士適四方使爲介大喪作士掌事作六軍之士執披  
凡士之有守者令哭無去守國有故則致士而頒其  
守凡邦國三歲則稽士任而進退其爵祿



諸子掌國子之倅掌其戒令與其教治辨其等正其位國有大事則帥國子而致于太子唯所用之若有兵甲之事則授之車甲合其卒伍置其有司以軍灋治之司馬弗正凡國正弗及

上言國子之倅而下言帥國子致于太子則諸子

掌國子及其倅非特倅也

上言以下據刪翼增

司馬弗正國

正弗及則是諸子正之太子用之而已

大祭祀正六牲之體凡樂事正舞位授舞器大喪正羣子之服位會同賓客作羣子從凡國之政事國子存遊倅使之修德學道春合諸學秋合諸射以攷其



藝而進退之

司右掌羣右之政令凡軍旅會同合其車之卒伍而  
比其乘屬其右凡國之勇力之士能用五兵者屬焉  
掌其政令

比其乘則比其乘之馬使齊力屬其右則屬其右  
之人使同心先王既合萬民之卒伍以時習之皆  
使知戰矣又屬勇力之士能用五兵者於司右使  
掌其政令則軍旅之事有選鋒以待敵齊民得免  
死焉無事之時武夫皆寓於官府無所奮其私鬥  
矣



虎賁氏掌先後王而趨以卒伍軍旅會同亦如之舍  
則守王閑王在國則守王宮國有大故則守王門大  
喪亦如之及葬從遣車而哭適四方使則從士大夫  
若道路不通有徵事則奉書以使于四方

旅賁氏掌執戈盾夾王車而趨左八人右八人車止  
則持輪凡祭祀會同賓客則服而趨喪紀則衰葛執  
戈盾軍旅則介而趨

持輪所以爲安也

七字據訂義增

旅賁則王衛之尤親者

王吉服則亦吉服王凶服則亦凶服王戎服則亦  
戎服亦與王同其憂樂也



節服氏掌祭祀朝覲衮冕六人維王之太常諸侯則  
四人其服亦如之郊祀裘冕二人執戈送逆尸從車  
方相氏掌蒙熊皮黃金四目玄衣朱裳執戈揚盾帥  
百隸而時難以索室毆疫大喪先匱及墓入壙以戈  
擊四隅毆方良

周官新義卷十二

後學 王簡 校訂



周官新義卷十三

宋 王安石 撰

夏官二

大僕掌正王之服位出入王之大命掌諸侯之復逆  
王眡朝則前正位而退入亦如之

王眡朝眡治朝也

建路鼓于大寢之門外而掌其政以待達窮者與遽  
令聞鼓聲則速逆御僕與御庶子祭祀賓客喪紀正  
王之服位詔灋儀贊王牲事王出入則自左馭而前

驅



路鼓四面示欲四方無所不達大寢之門外自外

至者莫近焉則欲其聞之速也先言

路鼓以下  
據刪翼增窮

者欲其速達甚于遽令王之牲事以事鬼神苟外  
不能治其人內不能正其身雖日用牲祭鬼神猶  
弗享也大臣眾矣所與治其人莫尊於大宰近臣  
眾矣所與正其身莫親於大僕故贊牲事以此兩  
官

凡軍旅田役贊王鼓救日月亦如之大喪始崩戒鼓  
傳達于四方窆亦如之縣喪首服之灋于宮門掌三  
公孤卿之弔勞王燕飲則相其灋王射則贊弓矢王



眡燕朝則正位掌擯相王不眡朝則辭于三公及孤卿

小臣掌王之小命詔相王之小灋儀掌三公及孤卿之復逆正王之燕服位王之燕出入則前驅大祭祀朝覲沃王盥小祭祀賓客饗食賓射掌事如大僕之灋掌士大夫之弔勞凡大事佐大僕

祭僕掌受命于王以眡祭祀而警戒祭祀有司糾百官之戒具旣祭帥羣有司而反命以王命勞之誅其不敬者大喪復于小廟凡祭祀王之所不與則賜之禽都家亦如之凡祭祀致福者展而受之



肆師誅其慢慢謂不肅也祭祀誅其不敬則非不肅之謂也祭僕受命于上以眡祭祀隸僕掌五寢掃除糞洒之事王皆以故習而親焉故也既置夏采掌復之正事又以二僕參馬復盡愛之道求所以生之不以方而已

御僕掌羣吏之逆及庶民之復與其弔勞大祭祀相盥而登大喪持翬掌王之燕令以序守路鼓

庶民之復大司寇所謂遠近惇獨老幼之欲有復于上者也故大僕言建路鼓以待達窮者聞鼓聲則速逆御僕也王盥而登御僕相之

王盥以下據訂義增



隸僕掌五寢之掃除糞洒之事祭祀修寢王行洗乘石掌蹕宮中之事大喪復于小寢大寢

王者七廟而曰五寢者蓋二祧將毀先除其寢去  
事有漸故也鄭氏謂唯祧無寢是也以文武爲二  
祧則誤矣禮記以遠廟爲祧當此時文武最爲近  
廟豈宜稱祧又不設寢乎然則二祧其高祖之父

與其祖與

此注據刪翼增

弁師掌王之五冕皆玄冕朱裏延紐五采纁十有二  
就皆五采玉十有二玉笄朱紘諸侯之纁旒九就璿  
玉三采其餘如王之事纁旒皆就玉璜玉笄王之皮



弁會五采玉璫象邸玉笄王之弁經弁而加環經諸  
侯及孤卿大夫之冕韋弁皮弁弁經各以其等爲之  
而掌其禁令

五采備采也十有二就備數也玉十有二備物也  
玉笄貫其上以象德也

司甲

闕

司兵掌五兵五盾各辨其物與其等以待軍事及授  
兵從司馬之灋以頒之及其受兵輸亦如之及其用  
兵亦如之祭祀授舞者兵大喪廡五兵軍事建車之  
五兵會同亦如之



司戈盾掌戈盾之物而頒之祭祀授旅賁及故士戈  
盾授舞者兵亦如之軍旅會同授貳車戈盾建乘車  
之戈盾授旅賁及虎士戈盾及舍設藩盾行則斂之  
司弓矢掌六弓四弩八矢之灋辨其名物而掌其守  
藏與其出入中春獻弓弩中秋獻矢箛及其頒之王  
弓弧弓以授射甲革楛質者夾弓庾弓以授射豻侯  
鳥獸者唐弓大弓以授學射者使者勞者其矢箛皆  
從其弓凡弩夾庾利攻守唐大利車戰野戰凡矢枉  
矢絜矢利火射用諸守城車戰殺矢鏃矢用諸近射  
田獵矰矢箛矢用諸弋射恆矢庫矢用諸散射天子



之弓合九而成規諸侯合七而成規大夫合五而成規士合三而成規句者謂之弊弓

凡祭祀共射牲之弓矢澤共射椹質之弓矢大射燕射共弓矢如數并夾大喪共明弓矢凡師役會同頒弓弩各以其物從授兵甲之儀田弋充籠箠矢共矰矢凡亡矢者弗用則更

膳人掌王之用弓弩矢箠矰弋挾拾掌詔王射贊王弓矢之事凡乘車充其籠箠載其弓弩既射則斂之無會計

橐人掌受財于職金以齎其工弓六物爲三等弩四



物亦如之矢入物皆三等箛亦如之春獻素秋獻成  
書其等以饗工乘其事試其弓弩以下上其食而誅  
賞乃入功于司弓矢及繕人凡齎財與其出入皆在  
稟人以待會而攷之亡者闕之

入于繕人則其王用也

戎右掌戎車之兵革使詔贊王鼓傳王命于陳中會  
同充革車盟則以玉敦辟盟遂役之贊牛耳桃茆

戎右與君同車在車之右執戈盾備非常并充兵  
中役使故云掌之

齊右掌祭祀會同賓客前齊車王乘則持馬行則陪



乘凡有牲事則前馬

金路以賓而謂之齊車者王敬賓事如祭故也

道右掌前道車王出入則持馬陪乘如齊車之儀自車上諭命于從車詔王之車儀王式則下前馬王下則以蓋從

齊右王未乘則前車方乘則持馬既乘而行則陪乘三者皆與齊右同

大馭掌馭玉路以祀及犯軼王自左馭馭下祝登受轡犯軼遂驅之及祭酌僕僕左執轡右祭兩軼祭軌乃飲凡馭路行以肆夏趨以采薺凡馭路儀以鸞和



爲節

書曰僕臣正厥后克正蓋僕正王服位以詔贊擯相前驅爲職王有行也僕爲之節王有爲也僕爲之道故祭祀則贊牲事既祭則王使馭酌焉明與之竝受福也

此注據刪翼增

戎僕掌馭戎車掌王倅車之政正其服犯輶如玉路之儀凡巡守及兵車之會亦如之掌凡戎車之儀

戎車之副謂之倅者若眾子之倅其嫡以備卒也有時而佐焉田車之副謂之佐者如眾臣之佐其君謂之卿佐也常以佐之爲事道車之副謂之貳



者如世子之貳其父謂之貳儲也有故乃攝而代  
之其義各有所主也掌凡戎車之儀戎以威爲主

甲冑有不可犯之色則戎車之儀可知矣

此注見刪翼所

引但稱王氏以訂義所引安石語證之知爲新義佚文

齊僕掌馭金路以賓朝覲宗遇饗食皆乘金路其灋  
儀各以其等爲車送逆之節

道僕掌馭象路以朝夕燕出入其灋儀如齊車掌貳  
車之政令

田僕掌馭田路以田以鄙掌佐車之正設驅逆之車  
令獲者植旌及獻比禽凡田王提馬而走諸侯晉大



夫馳

提節之晉進之馳則亟進之尊者安舒卑者戚速  
馭夫掌馭貳車從車使車分公馬而駕治之

貳車副車從車謂屬車也使車使者所乘之車

校人掌王馬之政辨六馬之屬種馬一物戎馬一物  
齊馬一物道馬一物田馬一物駑馬一物凡頒良馬  
而養乘之乘馬一師四圉三乘爲皐皐一趣馬三皐  
爲繫繫一馭夫六繫爲廐廐一僕夫六廐成校校有  
左右駑馬三良馬之數麗馬一圉八麗一師八師一  
趣馬八趣馬一馭夫天子十有二閑馬六種邦國六



閑馬四種家四閑馬二種凡馬特居四之一

趣馬下士阜一人繫一馭大則下士八人

春祭馬祖執駒夏祭先牧頒馬攻特秋祭馬社臧僕  
冬祭馬步獻馬講馭夫凡大祭祀朝覲會同毛馬而  
頒之飾幣馬執扑而從之凡賓客受其弊馬大喪飾  
遺車之馬及葬埋之田獵則帥驅逆之車凡將事于  
四海山川則飾黃駒凡國之使者共其弊馬凡軍事  
物馬而頒之等馭夫之祿宮中之稍食

攻特者駒之不可習者度人攻之矣及成馬而不  
可習則校人攻之臧僕則簡馭者簡其臧亦簡其



或不臧講馭夫者五馭之灋講其藝也

講馭夫以下據刪翼

增

趣馬掌贊正良馬而齊其飲食簡其六節掌駕說之  
頒辨四時之居治以聽馭夫

巫馬掌養疾馬而乘治之相醫而藥攻馬疾受財于  
校人馬死則使其賈粥之入其布于校人

牧師掌牧地皆有厲禁而頒之孟春焚牧中春通淫  
掌其政令凡田事贊焚萊

頒其地于牧人

廋人掌十有二閑之政教以阜馬佚特教駢攻駒及



祭馬祖祭閑之先牧及執駒散馬耳圉馬正校人員  
選馬八尺以上爲龍七尺以上爲駉六尺以上爲馬  
政以正之教以導之阜馬者養馬而阜之旣阜矣  
又佚特以蕃之旣蕃矣又教駉以成之攻駒則不  
可教者及其未駉攻之也圉馬則成馬而圉之圉  
馬以校人執駒爲節也正其員使員稱馬數正其  
選使選惟其能小大異名使各從其類以待乘頒  
及以爲種

圉師掌教圉人養馬春除蓐釁廐始牧夏庠馬冬獻  
馬射則充楛質茨牆則翦鬮



次草謂之茨詩曰牆有茨苦謂之闔以剉草爲苦  
圉人掌養馬芻牧之事以役圉師凡賓客喪紀牽馬  
而入陳廡馬亦如之

職方氏掌天下之圖以掌天下之地辨其邦國都鄙  
四夷八蠻七閩九貉五戎六狄之人民與其財用九  
穀六畜之數要周知其利害乃辨九州之國使同貫  
利

大司徒掌建邦之土地之圖以天下之圖知九州  
之地域廣輪之數則其所掌者特圖而已職方氏  
大司徒以下  
據刪翼增  
掌天下之圖以掌天下之地則所掌



非特圖也又掌其地焉邦國諸侯之國也都鄙諸  
侯之采地也東方曰夷其種有四南方曰蠻其種  
有八東南曰閩其種有七西北曰貉其種有九西  
方曰戎其種有五北方曰狄其種有六自邦國都  
鄙至於夷蠻閩貉戎狄雖有內外之殊然先王之  
政一視而同仁其人民之所聚財用之所出九穀  
之所生六畜之所產其數要不可以不辨也其利  
害不可以不知也數則列而計之也要則總而計  
之也利則凡可以利人者也害則凡可以害人者  
也周知其利害則將以與其利而除其害也

邦國以下



百七十九字  
據刪翼增

東南曰揚州其山鎮曰會稽其澤藪曰具區其川三江其浸五湖其利金錫竹箭其民二男五女其畜宜鳥獸其穀宜稻

自揚之五湖以至并之涑易皆其地之水可引以浸灌也然涇漳之屬後世更引以浸焉則民之利固有先王未之盡者變而通之存乎其時而已

漳以下據訂義增上二語乃王昭禹之詞與之刪節安石語以證昭禹去之則詞意不明故并錄焉

正南曰荊州其山鎮曰衡山其澤藪曰雲夢其川江漢其浸潁湛其利丹銀齒革其民一男二女其畜宜



鳥獸其穀宜稻

河南曰豫州其山鎮曰華山其澤藪曰圃田其川滎  
雒其浸波澆其利林漆絲枲其民二男三女其畜宜  
六擾其穀宜五種

正東曰青州其山鎮曰沂山其澤藪曰望諸其川淮  
泗其浸沂流其利蒲魚其民二男二女其畜宜雞狗  
其穀宜稻麥

河東曰兗州其山鎮曰岱山其澤藪曰大野其川河  
洸其浸盧維其利蒲魚其民二男三女其畜宜六擾  
其穀宜四種



正西曰雍州其山鎮曰嶽山其澤藪曰弦蒲其川涇  
汭其浸渭洛其利玉石其民三男二女其畜宜牛馬  
其穀宜黍稷

東北曰幽州其山鎮曰醫無閭其澤藪曰獫狁其川  
河泚其浸菑時其利魚鹽其民一男三女其畜宜四  
擾其穀宜三種

河內曰冀州其山鎮曰霍山其澤藪曰楊紆其川漳  
其浸汾潞其利松柏其民五男三女其畜宜牛羊其  
穀宜黍稷

正北曰并州其山鎮曰恒山其澤藪曰昭餘祁其川



虞池嘔夷其浸涑易其利布帛其民二男三女其畜  
宜五擾其穀宜五種

乃辨九服之邦國方千里曰王畿其外方五百里曰  
侯服又其外方五百里曰甸服又其外方五百里曰  
男服又其外方五百里曰采服又其外方五百里曰  
衛服又其外方五百里曰蠻服又其外方五百里曰  
夷服又其外方五百里曰鎮服又其外方五百里曰  
藩服凡邦國千里封公以方五百里則四公方四百  
里則六侯方三百里則七伯方二百里則二十五子  
方百里則百男以周知天下



凡邦國小大相維王設其牧制其職各以其所能制其貢各以其所有王將巡守則戒于四方曰各修平乃守攷乃職事無敢不敬戒國有大刑及王之所行先道帥其屬而巡戒令王殷國亦如之

九州之序禹貢始於冀次以兗而終於雍職方始於揚次以荆而終於并者蓋禹貢言治水之序職方言遠近之序治水自帝都而始然後順水性所便自下而上故自兗至雍而止以遠近言之則周之化自北而南以南爲遠故關雎鵲巢之詩分爲二南漢廣亦言文王之道被于南國德化所及以



遠爲至故也始於揚州則以揚在東南次以荆則以荆在正南終於并則以并在正北先遠而後近也

土方氏掌土圭之灋以致日景以土地相宅而建國都鄙以辨土宜土化之灋而授任地者王巡守則樹王舍

懷方氏掌來遠方之民致方貢致遠物而送逆之達之以節治其委積館舍飲食

逆送之以爲之禮達之節使無留難治其委積館舍飲食使有所資賴此所以懷之也



合方氏掌達天下之道路通其財利同其數器壹其  
度量除其怨惡同其好善

訓方氏掌道四方之政事與其上下之志誦四方之  
傳道正歲則布而訓四方而觀新物

形方氏掌制邦國之地域而正其封疆無有華離之  
地使小國事大國大國比小國

華與記爲國君削瓜華之同義

此注據  
義疏增

山師掌山林之名辨其物與其利害而頒之于邦國  
使致其珍異之物

稻人澤草所生種之芑種所謂利有如此者非特



中人用而已王孫滿曰夏之方有德也鑄鼎象物  
百物而爲之備使民知神姦故民入川澤山林不  
逢不若螭魅罔兩莫能逢之所謂害有如此者非  
特毒物及螫噬之蟲獸而已

川師掌川澤之名辨其物與其利害而頒之于邦國  
使致其珍異之物

邊師掌四方之地名辨其丘陵墳衍邊隰之名物之  
可以封邑者

辨其名以知平陂燥溼辨其物以知肥磽媮惡此注

據刪

翼贈



匡人掌達灋則匡邦國而觀其慝使無敢反側以聽  
王命

擯人掌誦王志道國之政事以巡天下之邦國而語  
之使萬民和說而正王面

都司馬掌都之士庶子及其眾庶車馬兵甲之戒令  
以國灋掌其政學以聽國司馬家司馬亦如之

周官新義卷十三

後學 王簡 校訂



(B)  
090.8  
3382  
[v.12]  
no.3  
0356840

月  
三



**(B)**  
**090.8**  
**3382**  
**[v.12]**  
**no.3**